

Troude ha **Milin** : **Ar marvailher brezoneg pe Marvailhou brezoneg**, dastumet gand ar horonal **A. Troude** ha **G. Milin** (ar galleg a zo dirag ar brezoneg). Brest 1870.

Notennou : Modernnaet eo bet an doare-skriva. N'eo ket gwir e vefe galleg e-barz. Skrivet eo gand an dorn al leor a zo bet prestet din gand Skol-Veur Vrést.

Troude : Brést 1803 – Brést 1885). Levezonet eo Troude, gwechou 'zo, gand ereadurez ar galleg.

*

An Diaoul o vond da Vrést

Gwechall Brést a oa eur gêr vihan ; ne oa eno, koulz lavared, nemed eun toulladig tiez. D'ar houlz-se, evid doare, an diaoul en-doa kalz a labour da ober e leh all, ha n'en-doa ket bet amzer da zelled diogh an tu-mañ d'or bro.

Eun devez evelato, hemañ, an aotrou-mañ, an diaoul eo a lavaran, goude beza greet gantañ e droiou dre e bark braz, da weled ha diwana a ree e ed, a lavar outañ e-unan :

“Sell, ar hoz kastell-hont n'ouzon ket petra eo, ha ma'z afen da weled piou a zo o chom e-barz ha war e dro ?“

Ha setu Gwillou koz neuze hag en em wiska evel eun aotrou kaer, gantañ, klevit, eru rokedenn voulouz hir ha losteg, eun tok seiz kern uhel war e benn, hag en e zorn, n'eo ket eur penn-baz, eur wialennig koant eo hag a frome dre ma skoe ganti tro-war-dro, evel da gas dioutañ c'hwez an ivern.

Gwisket Gwillou evel-se hag a bep tu d'e fri evel daou lost maillard, savet o fenn en êr, e tiskennas du-ze war-zu Treiz Plougastell, en eur wenodenn a welas eno.

Nezue e sell oh ar wenodenn hag e wel tudou o vond war-zu Brést.

« O ! eme Willou, pa'z int eet, e tistroint, ha marteze eh en gavo unan bennag ganen hebdale. »

En dro-mañ n'en-doa ket lavaret gevier, rag n'en-doa ket greet daou-hant kammed (hemañ bremañ a yee war e bouez evel eun aotrou ma'z oa), pa en em gavas gantañ eur wreg ha ne oa na koz, na yaouank.

« Gwreg vad, emezañ, ar vadelez ho-pefe da lavared din euz a be leh e teuit ? »

« Ya da, aotrou, euz a Vrést a zo a-hont d'an traoñ. »

« Hga oh ober petra oh bet eno ? »

« Me a zo bet e Brést o werza viou brein ha dour-lêz. »

« Petra, eme Gwillou, ha n'hoh-eus ket a aon da veza daonet ? »

« Mar bezan daonet evid an dra-ze, meur a hini a vezo estregedon hag evid meur a dra all. Amañ ez eus ganen holen ha mél am-eus prenet e Brést, ha bremaig, o tañva anezo, em-eus gwelet e oa leun a hrouan en holen ha bleudenneg ar mél. Gwelit diogh se, aotrou, ez eus bet greet din evel a ran d'ar re all. »

« Diogh a glevan ganeoh, e werzer kalz a draou e Brést, eme Gwillou. Ma vent traou mad, e teufe abred ar varhadourien da veza pinvidig ; ne deuint ket avad oh ober evel ma reont. »

« Ha forz se, gwerz a zo, gwerza a reer, ha mar teufe zoken an diaoul da Vrést, e kredan e ve gwerzet ivez, evitañ da gaoud spered hag ijin. »

« Me eo hennez, gwreg, ha ne vezin ket gwerzet e Brést, rag ne din ket di ; a-walh zo hepdon. Evelato, kredit ez aio ar stal da fall, koulz ganeoh ha gand marhadourien ar gêr-ze. »

Hag an diaoul kuit ahano, o leuskel flêr war e lerh.

Ar wreg-mañ a oa euz a Gêrhor, eun torad bugale dezi. Abaoe, he saout, dre ne gavent nemed geot fall da beuri, ne veze ganto nemed dour e-leh lêz, hag he yer ne zozvent nemed viou brein. He bugale a rankas mond da besketa evid gounid o boued ; anezo, a lavarar, eo

deut gouenn beskerien Gêrhor. Marhadourien Vrést kennebeud ne zeuas ket abaoe kalz a dra ganto da vad.

Ha setu penaoz an diaoul en-deus lavaret ar wirionez eur wech en e vuhez. Abaoe n'eo ket bet e Brést, ha ne zeuio ket ar wech-mañ c'hoaz.